

江西通志卷一百七十

方術

漢

嚴豐字孟侯豫章人王莽時官郡主簿莽既篡位太守河東賈萌與安成侯張普約舉兵師興之日有蜂叢集萌車豐曉占候以爲不祥萌進兵不聽會張普負約無援遂戰死謝承後漢書謹案太平御覽九百五十引謝承書不及張普負約事

唐檀字子產豫章南昌人少遊太學習京氏易顏氏春秋尤好災異星占後還鄉里教授常百餘人元初七年郡界有芝草生太守劉祇欲上言之以問檀檀對曰方今外戚盛陽道微弱斯豈嘉瑞乎祇乃止永甯元年南昌有婦人生四子祇復問檀變異之應檀以爲京師

江西通志卷一百七十 方術

當有兵氣其禍發於蕭牆至延光四年中黃門孫程揚兵殿省誅皇后兄車騎將軍閭顯等立濟陽王爲天子果如所占永建五年舉孝廉除郎中是時白虹貫日檀因上便宜三事陳其咎徵書奏棄官去著書二十八篇名爲唐子卒於家後漢書

唐

胡超僧洪州人聖歷中出家學道隱白鶴山微有法術自云數百歲則天使合長生藥所費巨萬三年乃成自進藥於三陽宮則天服之以爲神妙望與彭祖同壽改元久視放超還山賞賜甚厚服藥之後三年則天崩野朝

僉

崔季真洪州人家於郡西善鼓琴工繪事大厯中一夜

大雪見有老人避雪門下者神骨非常延入具麥麪以進老人曰麥稟四時之氣穀之善者沃以豉汁則彌佳又具松花酒以進老人曰花澀無味乃探懷中藥投之酒味頓美隨遺藥數丸圖一幅而去後季真出示茅山李合光合光曰此葛洪季子也季真好養生之術以故有仙緣云志安

朱邯豫章人精於周易得京管之遺法建中初遊楚賣卜青山人董元範母患奇病至夜即發邯爲筮之得解之上六曰君今日具衫服於道側伺有執弓挾矢而過者君向求之時邑人李楚賓喜獵其時果至元範邀之至家設酒饌留宿是夜月明如晝楚賓出戶徘徊見一大鳥飛集舍上引喙啄屋即聞堂內叫痛苦聲楚賓

江西通志卷一百七十 方術

引弓射之兩發皆中其鳥飛去痛聲亦止明日與元範四索於敗屋中得確捏古吐兩箭著其上皆有血光取焚之母患遂平太平廣記

趙山人洪州人崔丞相左遷在洪州時州帥曹王將辟爲副時德宗在興元曹王有功且親奏無不允山人既言事多中崔問之曰地主奏某爲副使且得過否對曰不過崔曰以時以事必合得過也山人曰卻得一刺史不久敕到更遠於此崔不信更問對曰必定耳州名某亦知之不可先言且曰今月某日敕到必先弔而後賀崔心瞿久之蓋言某日即崔之忌日也謂山人曰言中奉百千不中輕撻五下可乎山人笑曰不合得員外百千只合得員外起一間竹屋又問之曰我有宰相分無

曰有崔曰遠近曰只隔一兩政官不至三年矣及某日私忌洪州諸僚悉之江亭慰崔服皆北望信至西時見一人從北岸袒而招舟急使人問之乃曰州之脚力將及岸問曰有何除授崔員外奏副使過否曰不過卻得虔州刺史敕牒在此諸公驚笑果先弔而後賀焉明日說於曹王子鑑百千不受崔爲起竹屋一間欣然從居之又謂崔曰到虔州後須經大段驚懼卽必得入京也旣而崔舅源休與朱泚爲宰相崔復聞堂帖迫入甚憂惕時故人竇參作相拜兵部郎中俄遷給事中平章事

南昌縣志

李生中和末以明經應舉如長安途中遇一道士同行言意相得因言黃白術道士曰點化神仙小術也但世

江西通志卷百十 方術

三

人多貪將以濟其修故仙道祕之吾觀子性靜寡慾似可教者今以方授子可以濟乏絕而已如遂能不仕亦當不匱衣食得祿則弗復爲如爲之則貪仙道所不許也因手疏方授之別書藥草數種李每遇乏絕依方爲之無不成者及爲南昌令復爲之絕不成矣從子智修爲沙門李以數丸與之智修後遊鍾陵止賣藥家燒銀得二十兩以易衣時劉仁規爲刺史方好其事爲人所告幸而得免續搜神記

司馬頭陀名曦唐時人習堪輿家言歷覽洪都諸山鈴地一百七十餘處訖今猶驗一日至奉新參百丈曰近於湖南得一山乃一千五百善知識所居百丈曰老僧可住否曰不可和尚骨相彼骨山也時華林覺爲首座

詢之不許見典座靈佑曰此爲山主人也後往往山連帥李景讓率眾建梵宇請於朝賜號同慶寺天下禪學輻輳竟如其言志安

夏主信新吳浮雲宮道士能運掌心雷治石精至今丫

口石尙存祈晴禱雨輒應志安

厲歸真唐末道士遊洪都信果觀見三官殿內功德塑

像是元宗時夾紵制作甚妙多被雀鴿糞穢其上歸真

遂於殿壁畫一鶴筆跡奇絕自是雀鴿無復棲止尤能

畫折竹野鵲後傳歸真於羅浮山上昇玉堂閒話

豫章術者不知其姓名嘗望牛斗間有王氣因游錢唐

以相法隱臨安市上陰求其人臨安縣錄事鍾起有子

數人與錢鏐飲博起嘗禁諸子諸子多竊從之游起與

江西通志卷百十 方術

四

術者善乃私謂起曰占君縣有貴人求之市中不可得視君之相貴矣然不足當之起乃爲置酒悉召縣中賢豪爲會陰令術者徧視之皆不足當一日術者過起家鏐適在外來見起反走術者望見之大驚曰此真貴人也起笑曰此吾旁舍錢生耳術者召鏐至熟視之顧起曰君之貴因此人也乃慰鏐曰子骨相非常願自愛因與起訣曰吾求其人者非有所欲也直欲質吾術耳明日去五代史 謹案豫章術者舊志列五代今改附唐末

宋

王仔昔洪州人始學儒自言遇許遜得大洞隱書豁落七元之法出遊嵩山能道人未來事政和中召見賜號冲隱處士帝以旱禱雨每遣小黄門持紙求仔昔畫日

又至忽篆符其上仍細書焚符湯沃而洗之黃門懼不肯受強之乃持去帝蓋默祝爲宮妃療赤目者用其說一沃立愈進封通妙先生居上清寶籙宮獻議九鼎神器不可藏於外乃於禁中建圖象微調閣以貯之仔昔倨傲又少慈帝嘗待以客禮故其遇巨闕殆若童奴及林靈素有寵忌之陷以事囚之東太一宮旋坐言語不遜下獄死仔昔之得罪宦者馮浩力最多未死時書示其徒曰上蔡遇冤人其後浩南竄至上蔡被誅宋史僧巨然鍾陵人工畫山水知名於時每下筆峯嶺崖竇之外下至林麓猶作卵石松柏疏筠蔓草之類相與映發幽豁細路屈曲縈帶竹籬茅舍斷橋危棧景趣畢備宣和畫譜

江西通志卷一百一十五 方術

五

楊補之字無咎南昌人自號逃禪老人又號清癯長者水墨人物學李伯時梅竹松石水仙清淡閒野爲世六絕高宗朝屢徵不起從子季衡畫墨梅甚得家法又能作水墨翎毛補之甥湯正仲字叔雅晚居黃巖自號閒庵善畫宗補之而能別出新意同邑劉夢良善寫墨梅志安

李頗一作坡南昌人善畫竹氣韻飄舉落筆有生意顧所傳於世者不多也志安

鐸長老俗姓辜南昌人精形家術嘗爲南昌劉長老相地葬其夫婦觀者殊易之久之劉族繁昌又爲豐城李姓卜兆初啟土鐸辭去且戒曰返寺鳴鐘始可窆棺行未至偶他寺鳴鐘遂窆棺鐸震死於途李族自後始大

明初南昌劉子南新建趙子方豐城何野雲亦其亞也志安

元

傅椿年字莊叟進賢人能驅雷盪妖至元丙子以安集功授奉新尉不起志安

明

徐復高奉新縣崇元觀道士通法術永樂十五年省城旱復高登臺指麾雷鳴電掣大雨傾盆魚蝦盈街章江水淺三尺志安

張榮字宗禮新建人少業儒多病因精於醫療人有奇效未嘗責報遇貧困輒施金遺粟賴以活者甚眾甯獻王賢之舉爲良醫年七十三卒胡頤庵爲之銘子升繼

江西通志卷一百一十六 方術

六

其職行誼尤著官教授孫元椿進士任知府元龍亦舉於鄉志林

楊節譽進賢人受學於傅椿年天順中召至京師試以法能指揮風雨宮殿妖氣遂以蕩滅授帶俸錦衣衛指揮使不受後不知所傳謂之楊法師志安

沈應善字嘉言梁休文後裔其六世祖仕豫章因家焉事親至孝親歿廬墓三年問里稱之屢試不售一夕夢神人示曰上帝命汝活千萬人甯可守一編以自負乎既寤遂決志學醫遇蜀之韓隱庵師事焉初授素問內經諸書研究不輟徐進以導引之學及秘藏諸方三年韓別去曰九九之際遲我於峩峩之麓自是名益振凡士大夫無不與之游投以劑罔弗驗者歲竊則捐貲貲

藥以濟人之求靡有倦色居旁構一舍曰來安堂諸藥餌飲食無不具備羈旅貧苦者聞聲腐集年八十一忽語家人曰韓先生招以絨我將逝矣尋沐浴而卒著素問箋釋二卷醫貫集補二卷子長庚以經業補弟子員能世其學安志 謝志 沈應善前志誤編入唐今改正 謝志 沈應善王謨十代文獻略亦不能定爲何時人謝志以爲明人者蓋據其書有醫貫集補之作醫貫爲趙獻可著實明隆慶間人也姜展進賢人以醫久寓高安頗有儒行萬曆戊子己丑開連荒所在病疫展施藥濟困所活良多貧者尤德之安志 謹案姜展舊志載瑞州今改歸南昌

國朝

王大國字邑郊南昌人屢舉不第患痰疾遇異人授以素問內經及秘藏諸方遂精醫學切中肯綮同里杜氏

江西通志卷三十一 方術

七

子年幼久患癰癧大國投以二九即日平復南昌司理胡慎三左足患癰直穿腳底醫數易而癰日甚大國去敷藥止服湯劑不一月而愈巡撫蔡士英監臨鄉關肯疽大作大國爲調理速愈而不作楚同時有何述樵者精於痘科人以二仙稱之安志

喻昌字嘉言新建人自幼讀書多詭異之迹中崇禎庚午副榜尋詔徵力辭不就披髮爲僧復蓄髮遊三吳僑居常熟以醫名於世治療多奇中著醫門法律尙論篇寓意草年八十預知時至論坐而化昌無後其甥負遺骸歸過左蠡舟遭風浪首尾盡毀折獨骸龕一棺無恙屹然湖中後寄於靖安蕭寺有盜其旁銅環者立中顛斃今遺骸尙不壞郡人募立祠祀之布政使李蘭有題

辭調

朱容重字子莊南昌人明奉國中尉能詩工書法閒畫蘭竹小景四方之士遊豫章者以不得子莊筆墨爲憾所居蓼洲造請無虛日卒年七十九著有初吟草徐世溥爲序白志

八大山人名杳初爲高僧往來南昌常持八大入圓覺經遂自號曰八大有仙才隱於書畫題跋多奇慧不甚可解畫之最佳者松蓮石三種書法能懸腕作米家小楷行書得董華亭意世皆以爲狂及逢知己十日五日盡其能絕無狂態龍科寶記

涂居仁南昌人生而穎慧通音律善鼓琴康熙中薦於朝授工部主事擢刑部郎中秩滿遷福建興化知府居

江西通志卷三十一 方術

八

仁力辭遂留直

內廷分輯律呂諸書食正三品俸縣志

閔應銓字六長南昌人自號湖上散人工詩善書嘗題

詩金山寺

聖祖南巡遊

宸鑒時廣甯郡廷極侍側識其名未幾廷極撫江西下車首致延訪一時碑版文字多出其手士林重之府志

李仍字漢孫南昌人幼孤好學能詩工畫法宋元人能

自出新意有潔癖終身不娶母死遂茹齋自呼曰繡佛

人與同邑彭廷謨歎人吳雯炯友善年五十三卒府志

涂岫字平山南昌人工繪事畫人物神采刻露生氣拂

拂出紙上閒爲設色花卉渲染穠麗同時蔡秉質工畫

鵝臨江黎坤工山水嘗與閔應銓彭廷謨李仍輩往來
東湖廷謨擅場題詠時有涂菊蔡鵠閔蟹彭詩之稱會
中又有按察司經歷某逸其名畫桃獨絕人呼千葉桃
經歷府志

胡郁卿有道術新建人歲早取大龜數十各綴鐵牌書
符篆置樹陰詰旦遣人分投深潭內薄暮雲騰雨澍稼
乃大熟或以爲觸龍法也府志

朱純嘏字玉堂新建人幼習舉子業後通醫術治痘疹
尤得秘傳康熙間大吏薦之授太醫院御醫府志以上南昌府

宋

無名相士精風鑑筠州太守聞之爲徧召賓僚試其術
時曹利用爲巡檢同王務本在座相者言利用後當極

江西通志卷一百一 方術

九

貴坐客皆笑復問務本何時登第曰須巡檢入兩府時
耳客皆曰烏有是後利用以使契丹有功爲閬門使十
年閒列位樞府而務本適登第後爲海州推官府志

彭攀龍字淵材新昌人工於樂律獻樂書於朝爲協律

郎飭粥不給乃歸安志

鄒王臣字元佐涉獵書傳精通五行以人之年月時日

推其壽夭禍福貴賤貧富萬不差一自言凡看命須隨

所見卽談無不奇中若稍涉思慮則相去遂遠矣著有

洪範福極彝倫奧旨五卷貴命四十九格行於世安志

方子明道人也寓高安聖壽寺蘇子由贈以詩有水永

成銀利十倍丹砂爲金世無對之句樂城集

陳善字德成新昌人以策授承信郎歷臨安幕監岳州

軍改江西憲幕得父建龍虎山之術鞭霆致雨每歲旱
賴其所禱號月湖先生安志

元

周德清高安人工樂府精通音律著中原音韻虞伯生
序之安志

潘濤上高人累世以業醫顯名至濤益著著醫學繩墨
一書其目有十一切脈二問證三斷病四辨逆順五明
標本六立治七審輕重八處方九用藥十調理行於世
安志

宋

曾義山一名法興上高人善占術青田劉基丞高安法

興過之語曰相公聰明絕世而器宏遠當爲一代偉人
吾書盡以相贈基借觀乾象諸書法興以原本界之曰

江西通志卷一百一 方術

十

吾不欲留此以爲家禍也後明太祖嘗問基知所授受
乃令有司爲法興營居室表其墳墓安志

明

劉侃字豫甫上高人元季瑞州路學正與高安丞劉基

奉新胡泰爲友精於易卜世亂棄官家居懸棹爲識號

銀河棹與人言吉凶無不立驗凡上高業陰陽術者悉

祖之洪武初以薦舉復任本學訓導著有銀河棹外編

上高縣志

鄧詳甫高安隱士也嘗遇異人授象緯韜鈴之祕避世

不仕劉基來丞高安詳甫見而奇之基與遊盡得其蘊

論者比之圯上老人安志

李綱善地理爲世宗營壽陵特授欽天監博士新昌縣志

胡任高安人醫術最精利濟甚廣著有醫方諸集安志

國朝

朱九錫高安人與同邑胡文瑜並能以符錄治病總漕

林起龍試其術異之薦入藩邸禮幣遣歸縣志

鄧筠山高安人叔象先真元觀道士贛人某病於觀不

能起筠山來省其叔善視之某病愈授以形家術能視

地於五尺以下辨其質色縣志

劉定侯以字行新昌人太學生幼習醫能揣脈預決人

生死不少失富家子病延定侯往治時病者之婦固無

恙也定侯告富人若子無害若子婦不久病作當死富

人未之信越三日子婦果暴卒縣志

朱彬字大雅高安人性孝友少工舉業累試不得志讀

江西通志卷百七 方術

靈素書喟然曰此亦濟世事也遂攻醫宗法仲景兼及

河間東垣叔和海藏景岳嘉言諸家治療多奇中卒年

八十二縣志

邢增捷新昌人習醫治病有奇效嘗輯所治療為醫案

心法兼善導引術縣志上瑞州府

南唐

何溥字會通袁州宜春人天資穎異習形家言元宗聞

其賢累詔起之擢國子祭酒保大中鄒廷翊相皇陵於

牛頭山溥言不利極表諫諍忤旨謫休甯令溥至邑即

改縣基吳王墓後倚松蘿山前名真武下壇形未幾卜

地縣東南隅居焉舍前削石按太極八卦諸圖茂林修

竹時時披襟嘯傲其閒後主時復徵不起隱芙蓉山削

髮為頭陀雖假迹禪門絕不譚釋語每誦道德經必歎

曰真聖人也孔子豈欺我哉由是專修長生煉化之術

所著論氣正訣一卷傳世十國春秋

明 伍子英萬載人幼習儒後精於醫就診者應手而瘳時

稱其有起死回生之術同縣張錦亦精醫遇異人授秘

方治患蠱者立驗府志上袁州府

宋 鄒公新淦人甯宗時有雷擊物為產婦所觸不能上升

時鄒故為巫忽有神請曰為誦解穢呪千徧當有以報

鄒誦訖神授鞭印各一曰祈晴順印祈雨倒印用鞭畫

空雨止畫處神忽不見雷升天矣鄒平生喜食鴨嘗過

江西通志卷百七 方術

其女留殺鴨為黍時曬麥於庭天有雨勢女欲收而後

饌曰雨當無損於麥須臾大雨鄒望空四向而畫獨庭

無雨由是遠近人招之祈禱如法用印無不立應年九

十餘卒鞭印亦亡鄉人祀之玉笥山承天宮前廟中號

曰鄒公異聞錄

元

李天和新淦人少倜儻任俠精於絲桐子嵩壽善繼其

緒天歷二年天和命嵩壽奉書吳澄論三操五絃之辭

合其於琴蓋卓業也吳草廬集上臨江府

唐

劉守真善調風角揚州刺史楊行密遣將周本圖吉州

與刺史彭玕戰於象牙潭玕敗走立寨新淦楓岡聞守

真名召至軍中每逆戰守真以術厭之敵不能破一夕劉死玕戰不利棄寨去江南野史

宋

彭仲元安福人得星禽之術善占候風雲太平興國初郡守王延範署爲防城溫仲舒向敏中倅廬陵仲元言其當大貴不數年二人果登輔相大中祥符中詔入署北御園指揮使言事頗奇中安志

劉元賓連舉於鄉任潭州司李通陰陽醫藥術數真宗試之驗賜名通真子所著有集正歷橫天卦圖神巧萬

金方注解叔和脈訣傷寒論洞天鍼灸經安福縣志

達僧姓劉氏居安福下邨水南院善地理著有撼龍經

天元一系諸書吉安府志

江西通志卷一百一十五 方術

劉德昇遇異人授大衍數能於掌中知未來事王瀘溪

嘗贈以文安福縣志

劉惠卿以善醫名楊誠齋贈之詩有活卻千人藥一囊

陰功吹作滿城香之句安志

元

王東野永新人精方脈嘗著本草經當時知名任太醫院御醫虞文靖揭文安程雪樓劉申齋趙子昂咸與之交而尤厚趙魏公以本官致仕歸邑人曠處良傳其學

永新縣志

藍玉仲永新人精方脈預言人禍福壽夭奇中體豐龐善飯士大夫家爭與致之其起人病瘵或以一劑或以前醫所立方增減一二或亦無所增減第稍差等分無

不立效或曰其術多得之藍元初玉仲族叔父也安志

劉嬾窩安福人少卓犖里晏氏子病危忽一道人款門

日與錢千貫吾當治之晏委錢恣所取道人日攜百錢

飲酒家暮醉則歸忽早作呼晏辦一犬置病子前令健

夫夾持之道人坐其後默攻之病子苦甚欲起戒夾者

堅勿動夕乃罷明日又如之病脫然矣其犬一夕垂絕

嬾窩視而歎曰術則奇矣如犬何道人喜曰仁言也復

命取一新磚置犬前如前攻之犬搖尾去磚則墳矣更

不受謝取書數卷授嬾窩去遂以醫名世安志

潘碧山安成人善風鑑傳與礪贈以詩有直言往往驚

四座乃使世人畏其口之句礪傳

謝茂德精岐黃之術時以仙翁目之礪傳

江西通志卷一百一十五 方術

明

彭用光廬陵人善太素脈言多奇驗所著有體仁彙編

安志

王昂廬陵人通古今諸醫書人有危疾集郡中諸醫無

能療者昂投劑立應其不可者任羣醫出計施巧不活

也嘗語人曰余每遇疾艱危未嘗不退而深思求爲必

活之計又曰醫以輔養元氣非與疾求勝也夫與疾求

勝者非味雜辛烈性極毒猛則得效不速務速效者隱

禍亦深吾甯持久緩待其自復也人有疾輒往視之不

責其報安志

周騎龍廬陵人成化閒以善談祿命著名豫章尤精範

圍數御史趙敵按江右威望甚著及瓜代當還朝騎龍

曰不然行有西北之調敵頗疑之未幾調晉臬敵問之騎龍曰公元數一六六四會數一七四數有從臣清要捧天書烏臺青瑣遷藩臬之句何可逃也敵始服其術因求範圍歌訣爲之序而梓之以廣其傳

豫章

郭修翰永豐人父益懋爲諸生僑寓惠州興甯生修翰讀易讀史手不釋卷母盲廢自謂採給行傭吾不如江次翁遂窮天文七政諸書賣卜於市得錢供母星學名一時有人問壽曰子不及稷迫五月三日其人怒反詰之曰吾稷及金矣越明日疾作張督府岳以司馬內召過程鄉召問之對曰猶寄長城三歲張愕然尋有麻陽之命言王方伯當大用一歲兩遷但不得專敕王曰方伯例必列銜中丞撫一重鎮何爲無敕果尹京兆再遷

江西通志卷一百七

方術

五

卿陸方伯杰深信之薦於邱大參民範言其旬日必及禍邱怒欲罪之以出陸門下姑遣人守之使不得逸去至期果蓋棺貳守莫同自惜不及第恆俯首於人修翰言一歲入召再歲按察提刑若持左券然庚戌六月病羅俶問之修翰曰而命當先我死猶來問訊邪初三羅無病驟卒修翰自知死期云我六旬有六六月六日無生理果然

廣東通志

趙銓字仲衡廬陵高唐里人精岐黃術以諸生貢於朝仕靈壽霍山兩邑夏貴溪大拜入京夜泊吳城靜中忽傳呼聲雜以絲竹金革市驛交喧月下隱隱有宣言藥王到者貴溪詢藥王何人曰姓趙已而寂然乃銓舟至貴溪索見與語大加賞異即同入京會世廟不豫太醫

束手貴溪及大臣公卿咸舉銓入診視不終劑而聖躬大安後解組歸惟著書修真而已有乞醫者即赴之不責人金帛而施藥不怠又善太素脈清江蕭須山病篤銓往適病者假寐先診其長子取酒相賀曰子脈無憂何妨乎父壽投一劑而愈出都門時見一死者已含斂方下棺銓下馬啟其衣衾令取沸水下刀圭灌之而甦其神類如此銓臨終無病腹中閣閣作聲笑曰龍吟虎嘯風雲慶會吾當赴之有頃異香滿室頂上生光彩冉冉而上而銓坐逝矣經日如生所著有春風堂集石亭醫案岐黃旨諸家醫斷太素脈訣

廬陵縣志

江西通志卷一百七

方術

六

無不奇中嗜酒豪邁視利如土

安志

蕭公伯泰和人善畫照其染色處可占人榮枯不但肖之而已時有畫師寓邑之普覺寺公伯慕其名往事之盡得其法一日汲水故遲至師責之公伯曰適見二鬼鬪因忘歸遂以水畫地作狀師大驚服遂有名

安志

國朝

郭詡號青狂泰和人善雜畫信手作人物輒有奇趣而詩尤過之其姪巖學之益精妙並入圖繪寶鑑

安志

甯榜高字君起蓮花廳人精律歷之學作提規渾儀圖推驗皆中

廬志

王灝字上一蓮花廳人少穎異嘗圖周天躔舍於牀頭久視有得坐冷露中指點星象如披甘石圖經康熙中

考授天文生府志

郭鳳藻廬陵人七世以醫名雍正六年郡城疫鳳藻謂是廬市藥集人畜駢闐溝渠惡氣所蒸染受者稟氣不齊不可偏治乃運精思合藥徧施之活人無算鳳藻左手患風痺數年能自運氣治之卒無恙子隆遇世其業府志

宋

徐熙字淡山金谿人善寫淡墨山水受知徽宗欲授以官熙對曰臣願為布衣人也上即賜名布衣高士縣志

陳撫臨川人周益公必大贈以正易心法易索兩書謂心法出麻衣道者傳自希夷先生可以求天理易索太和張汝明所作可以知人事撫得之遂以精易卜名府志

江西通志卷百七 方術

七

陳自明字良甫臨川人精於醫以李師聖郭稽中所著產論室慶諸集綱領漫而無統節目略而未備醫者不能深求徧覽乃採摭諸家附以家傳驗方編輯成書凡八門數十餘體總二百六十餘論論後列方是為大全良方金壇王肯堂為證治準繩女科一部全用之安志

元

普稱撫州僧也至元間人初唐一行禪師作星厯書十有三家誓曰國興則見未興則隱後青城山僧號枯木傳此書於史彌遠家至普稱又得其傳其後四明慧月號琴堂者挾斯文至大都明南昌僧號普庵復獲此書於天界寺授括蒼季宗舒遂揚其波至今稱琴堂五星星學大成

明

曾易明金谿人景泰中遇異僧授以堪輿家術為人卜地衰旺興廢輒先定其年月日時皆奇中臨川饒氏館易明於家者三年事之特謹然終不敢以地請最後易明乃指示曰某可墳某可宅卒賴其力或以富貴傲即有重賄輒拂衣去不娶妻無子漸能辟穀不知所終安志李興生樂安人患風痺欲飲食則仆臥於地始能下咽欲言則畫地作字始達其意頗能詩董侍御未第時獻詩曰清時早展為霖手莫遣蒼生望八荒後董欲養於官辭以母老為作傳比之支離子與之流安志謹案詩舊志列之方技未明其旨

張神峯臨川人精星學以五行祿命諸書治習訛舛著

江西通志卷百七 方術

六

關謬一書海內星平皆宗之安志

國朝

熊暉字曦南宜黃人父岐梧工畫人物暉少有神悟乃變家法為山水入都客莊親王邸得縱觀古人名本所詣愈超嘗為鳳岡春曉圖觀者至坐臥其間不能去縣志

撫州府

元

危亦林字達齋南豐人世業醫高祖雲仙嘗游東京遇仙人董奉二十五世孫授以秘要祖碧崖又師周伯器亦林幼嗜學好博覽官本州醫學教授嘗集其高祖以下所為醫方著書二十卷縣志謹案亦林著世醫得據縣志事實補傳

明

危斗南佚其名南豐人少遊吳越訪道凡象緯輿圖輅略奇遁獨獲秘授蕭然委里同里閑者輕之獨劉冠賓一見執弟子禮斗南精於太乙自斷沒期不爽又嘗言明祚止於甲申南豐禍於乙酉至期斗南已先二年卒

縣志

國朝

李如璋字子孚南豐人幼通敏五官並用尤精九章數學順治壬辰度田令下疆域新定田賦紛錯民緣為姦邑中集工算者數十人月餘不能理如璋年十五晒其煩苦掣珠盤左右撥無遺銖黍數日畢事江右勾稽金穀皆出其手無有差忒今以為便調遷得嘉定江灣司

江西通志卷百半

方術

九

巡檢以不肯俯仰上官投劾歸懷葛堂集以上建昌府

宋

鄭同字亦虛玉山人以行義見推於鄉尤精書法舉八行科不果上米元章與同帖云晝寢夢龍蛇繞榻及覺乃小兒披來翰也其稱之如此志安

俞直玉山人通素問玉冊之書內外常變之辨至河洛易象太元之數三統九經五行納音之旨無不求其義而為說秦檜為相欲館置直謝不肯就紹興辛巳金人犯淮用事者遣使問以兵退之期言皆切中玉山志

葉子仁上饒人推算筮占往往如破的歲乙酉真德秀方在班子仁以書勸補外甚力未幾果去國子仁每推論五行輒以善道勉人如孝弟忠信清心寡欲等語未

嘗不懇切言之真贈以絕句云易象推占妙入神勸人忠孝更諄諄只今誰似君平術惟有南陽賣卜人信錄

元

方壺子姓方氏名無隅龍虎山人學仙於金蓬頭結社於張孟循虛伯良其畫冠絕一時尤精於竹張字初稱為壺仙嘗於高石徐氏畫青山白雲圖學士虞集題句

畫史

張與材字甲梁號微山別號廣微子善畫竹與龍張嗣成號太元能畫龍亦畫有廬山圖張嗣德號太乙善寫墨竹禽鳥吳霞居龍虎山善畫龍畫史

明

林森上饒人家世業醫資性靈朗博究羣書郡舉任醫學正科活人之功不可勝紀志安

江西通志卷百半

方術

三

洪濤弋陽人少業儒後專醫每施藥濟人如神授太醫院副從征交趾軍中大疫濤煮蒼朮黃柏百錢徧飲皆愈改榮藩良醫正王缺濤擢藥補之愈賜建國醫坊號為補辱先生年九十致仕志安

周詔字天章上饒人為人俊雅出塵輕財好義嘗於江湖中遇異人授以地理指掌圖盡得山川源委脈絡之詳以是邃於地理蔡虛齋稱其談論符經義脫世味有近道之資欲論薦之未果因為序以見意志安

張祉字天與鉛山人幼習舉子業因繼母疾不愈遂棄所業徧訪名醫傳鍼灸之法為人尚義人病多賴以生更不責報善書能詩所著有筠石集志安

程福生字梅巖玉山人精書法有燕京承天門關王廟碑諸迹尤工八分書善畫梅嘗輯金石遺文數卷

安志

王適字太古玉山人初充府掾棄去究詩書尤工畫聲名藉藉人以畫強索不肯褻應遇知己酒酣興到筆

淋漓殊足珍玩著太古集二卷

安志

邱可封字汝禮貴溪人由歲貢歷官國子典簿博覽羣書通天文尤精素問與人切太素脈談休咎終身不爽

著有醫書及經驗奇方多自出新意

府志

國朝

潘夷字爽之上饒人工畫得意處似雲林石田非其人不輕作又善詩歌長汀黎愧曾好之爲文序其集

府志

林世珍字尼望上饒人弱冠失怙撫諸弟有恩工醫有

江西通志卷一百一 方術

主

盛名周某者患喉癰將危星夜相迎適世珍自病辭不能往迎者固求世珍謂諸子曰余病未及死猶得活人

豈非仁術力疾往視不數日愈世珍病益篤竟卒

府志

傅源溶字鶴年廣豐人諸生善相地嘗移廣豐學宮功

既成人文蔚起

府志

俞鑑字琢荆廣豐人諸生以畫名族子某五日求畫鍾

旭強之始應畫成族子去鑑私告人某得此畫竊慮非

福已而果然人問故曰是固不能敬事神明者我畫時

如有神在前已盡得其靈氣得之而裝不獲譴責乎

府志

毛有華字旭儀弋陽人以親老家貧棄儒習醫善治篤

疾活人無數

府志

汪資孫弋陽人居鄉曲潛心醫學活人無算喜施貧乏

雖獲桂重值無少吝會城中疫起親戚延資孫治皆愈

夜夢神人讓之曰若等死皆厄數子何爲治之不卽歸

縣志

當疫爾鄉族資孫不得已歸後城中疫亡甚眾

汪楚真弋陽人精青烏術與樂平華堯賓齊名嘗爲樂

平朱氏卜葬云是地當起科名惜脈氣降自奎婁福恐

不全後子孫成進士皆補官遽卒又嘗偶憩汪姓見其

家窶甚指一窪地爲葬約三年後酬金三百聞者咸笑

其誕年餘汪三獲藏窖成巨富

縣志

董友愈字南仲弋陽人諸生工相地最有名譽嘗曰吾

不待其所知以貪天工亦不自欺其所不知以速人禍

早喪偶鰥居四十年勤於所學蕭然無俗累

府志

葛天申字仁山貴溪人由進士官原武知縣生平嗜形

家書客吳越間最久座主山陽汪廷珍歿天申走千里

往弔且爲擇吉壤眾非之天申預言土中靈異以爲驗

眾謗益甚寔日發土按之皆驗眾愧服而去

府志

周明五字惇庸貴溪人究心形家言凡景純葬經楊曾

廖賴諸書無不博覽挾其術遊覽名山大川爲人營葬

卜宅決休咎多驗著有增補理氣圖說四卷

縣志

唐

柳翁天祐中人常乘小舟釣鄱陽江中凡水族之類與

山川深遠者無不周知鄱陽漁者咸咨訪而行呂師造

爲刺史修城掘濠至城北則雨止役則晴或問柳翁翁

曰此下龍穴也震動其上則龍不安而出穴龍出則雨

掘之不已則霖雨方將爲患既深數丈果得方木長數

江西通志卷一百一 方術

主

尺交構疊之累積數十重其下霧氣衝人不可入而止
木皆腥涎縈之刻削平正非人力所爲自是果霖雨爲
患呂氏諸子將網魚鄱江召問翁翁曰南岸一處今日
有魚然有一小龍在焉諸子不信網之果大獲舟中以
巨盆貯之有一鯉長一二尺雙目精明有二長鬚繞盆
行羣魚皆從將之北岸遂失所在柳竟不知所終精神錄
郭常饒州人業醫饒江其南導自閩頗通商海外波斯
安息之貨國人有轉估於饒者會一估客至病亟他醫
莫能治請常爲診曰誠能生我當酬錢五十萬常因舍
之先以鍼火雜治導其血關然後輔以奇藥月餘而愈
欲歸常所許財不受估曰先生以爲寡歟常曰吾計藥
之值不能損于文而所受非任反禍耳人以常爲詐而

江西通志卷三 方術

重

責常常曰夫販賣之人計量於毫銖之間今奪其五十
萬則必追悵鬱惋其人病新去六腑方復有悵然之
氣自內而伐即不可救彼方有疾知我能治而告我我
幸免之因利其財而又使其死是爲不仁矣吾何敢沈亞

宋

吳景鸞字仲翔德興人漢長沙王芮裔孫祖法旺喜天
文地理之學聞華山陳搏洞微秘奧遣子克誠師之得
其肯綮一日搏命之歸曰汝子仙才能紹業盡以青囊
書授克誠誠子即景鸞也聰慧過人得其書精究有驗
慶曆辛巳詔選精陰陽者郡縣舉景鸞至京入對稱旨
授司天監正未幾因論牛頭山山陵章奏過直上不悅

下獄尋以帝晏駕遇赦又進中餘圖不報知時不可遂
佯狂髡髮修真於天門西岸白雲山洞往來饒信二州
數處同日皆有景鸞迹治平初一日忽以遺書付其女
沐浴更衣端坐而逝所著有理氣心印吳公解義志安
傅伯通德興人與鄒仲容同師廖金精金精得之吳景
鸞宋南遷伯通拜詔往相臨安表略曰顧此三吳之會
實爲百粵之衝錢氏以之開數世之基郭璞占之有興
王之運天目雙峯屹立乎斗牛之上海門一點橫當乎
翼軫之間雖云自昔稱雄實乃形局兩弱只宜爲一方
之巨鎮不可作百禩之京畿駐蹕僅足偏安建都難奄
九有表上竟升杭州爲臨安府而稱行在志安
鄒寬字仲容師廖金精得其術爲汪伯彥卜地葬親乃

江西通志卷三 方術

重

借堪輿家論貽書以動之末云方今幽燕未歸版籍朝
廷有意恢復倘值此時揚師整旅當勿計名位高卑昌
言於朝奮力請進必立希世功名若參之他意微有更
改妄觸一機百關俱廢汪是其言而不能用丁未拜相
鄒術果奇而書中之議竟托空言志安

王克明字彥昭饒州樂平人徙烏程初生時母乏乳餌
以粥遂得脾胃疾長益甚醫以爲不可治克明自讀難
經素問以求其法乃愈始以術行江淮入蘇湖鍼灸尤
精診脈有難療者必沈思得其要然後與之藥病雖數
證或用一藥以除其本本除而餘病自去亦有不予藥
期以某日自安有以爲非藥之過過在某事當隨其事
治之言無不驗魏安行妻風痿十年不起克明施鍼而

步履如初胡秉彝妻病氣秘腹脹呼號踰旬克明以半
疏丸碾生薑調乳香下之俄起對食如常廬州守王安
道風噪不語旬日克明令熾炭燒地灑藥置安道於上
須臾而蘇金使黑鹿谷過姑蘇病傷寒垂死克明治之
明日愈及從徐度聘金谷適爲先排使待克明厚甚訝
之谷乃道其故後再從呂正已使金金接伴使忽被危
疾克明竝起之卻其謝張子蓋救海州戰士大疫克明
在軍中全活者幾萬人張欲上其功力辭之克明頗知
書好俠尚義嘗數千里赴人之急初試禮部中選累任
醫官王炎宣撫四川辟克明不就炎怒劾克明避事坐
貶後遷至內翰林醫痊局賜金紫紹興五年卒年六十
七

宋史

江西通志卷一百一 方術

五

楊賁亨鄱陽人博羣書精脈理每心計造方有患飢者
諸醫以火證治賁亨久思之未得頃見堂上木橙自仆
乃爲淫氣所蒸致朽忽悟水能消物不獨屬火此淫消
爾投熱劑而愈又有顯者瘡目性躁日憂切益不瘳賁
亨給曰目可計日即痊第懼毒發於股又日撫其股憂
之後目忽瘳而股亦無恙蓋誘其心火下降爾術遂大
名於時

白志

富春子善推占嘉熙丙申客饒語人曰此州將出宰相
然未見其人也他日自饒還池州又曰何爲宰相聲復
在此方驚咤不自決值國忌提舉段震午而下羣集報
恩寺富春子往候焉一見池州教授馬廷鸞鸞曰此其
人矣後果驗

白志

元

蔡槐字月湖德興人僑居建康少讀書卓犖不羈好相
人不妄許可至元二十三年與學士傅立等偕召詔問
朕壽幾何對曰仁者壽陛下壽及八旬時春宮未建當
賜見便殿俾定儲君於諸王孫中對曰某太孫龍鳳之
姿天日之表他日必爲太平天子後七年登極卽成宗
也久之大臣有爲姦利者請問休咎槐拒不往他日見
於朝辭色甚怒槐曰相公能憂國愛民自可享期頤之
福何問爲然亦懼其譏授集賢學士辭不拜乞歸田里
從之已時相果敗元貞改元復召不赴

豫章書

江西通志卷一百一 方術

五

識我今日時師後代仙李懇求吉地梁卽指示穴處屬
曰貴從武功來禍後福始應葬數年李以罪戍定遠產
黔甯王英明祖育之軍中賜國姓復賜姓沐追封三代
皆爲王

安志

操貴持字子敬浮梁人也官教授卜筮多奇中

安志

李時茂字誠仙居至道宮有閉縱陰陽之術善役使鬼
神風雪雷雨祈禱立至鄉人稱爲李神仙

府志

張愷鄱陽人良醫季民孫善療奇疾有女子呵欠兩臂
直上不能下諸藥莫治愷令其母解女子裙襦坐寢室
乃揚言醫入女忽擲手下掩體舉動遂如故又一小兒
坐高處懸跌於地瞳人倒視見房屋皆翻覆愷令有力
者將小兒顛倒數次其視卽順凡藥石難療之疾愷不

執方脈以意治之無不立愈府志

明

楊文德樂平萬全鄉人攻醫精內經太素脈明初徵入太醫院洪武戊寅乞歸田里上書種德二字賜之舟抵饒城醫者劉宗玉延之文德爲講岐黃心法以太素授之紫極宮朱道士疾文德診之不數劑而愈朱以銀飲器謝之卻再三方受中途長嘯宗玉子烈方在旁問故文德曰徒受其惠明年春肝木旺脾土受剋至期果死黃復昌疾文德診之曰一劑卽痊官貴脈旺秋當入仕尋以當路薦授丹陽令所著有太素脈訣一卷安志董德彰名潛德興人事寡母至孝一日救白神龜夢示仙書於石巖中得之遂精堪輿不計利不得葬者助之

江西通志卷百七 方術

三

或一葬未善復爲之遷時稱董半仙著有四神秘訣水法等書同邑程天昭著有道法雙談撼龍疑龍二經注解傳於世縣志

張宗烜字明遠德興人精岐黃術著方書數千卷縣志

高道者得長桑君禁方當明初挾技遊銀陽一日值柩於途謫之乃孕婦喪也道者驗其遺衣血曰此猶未死啟其棺一鍼而甦今傳其小兒方術無不驗者安志

江濟字汝楫本姓鄭天順己卯舉雲南鄉試歷官同知

善山水浮梁縣志

程世光鄱陽人擅小兒科憲王誕長子初出胎不知吮乳曰難產傷氣持人蓂煎湯灌半匙卽吮又舟工生子胞而無皮取土數升糝其體卽成肌有胎婦兒腹嘔傾

豆於地令婦低首拾之兒嘔止其醫多以意出弗拘方書具有神效府志

孫卓三浮梁人精岐黃之學正德閒宸濠變邑令某妻走避山中病瀕閉急召卓三視曰此盛暑急走過飲水轉胖證也取豬肝鼓氣偪腹中如法治之而愈新安男子病淋久諸醫弗能治卓三藥之亦勿驗偶以罐注水悟孔竅通塞之故於腦後灸艾三壯立愈安志

項世賢樂平人名嗣宗以字行幼警悟師事德興彭宗伯洞岐黃術遇異人授以子午八法沈疴宿疾皆應鍼而起廣信有遽除者賢鍼之而平施惠於人至老不衰府志

蔡天奇浮梁諸生從素問本草精以深思亦不屑屑赴

江西通志卷百七 方術

三

人之召人有危疾問天奇天奇輒問他醫診狀觀其方增減一二而奇中嘗示諸醫曰人有重病則我亦病病窮日夜之思僅可得起一人汝輩慎之安志

吳從善鄱陽人本道士善相法郡守甯某與弟貌相肖初令假衣冠坐廨中試之從善揖而不拜曰此非四品骨取皆失笑見稅課呂銘曰官當至二千石後果擢刑部郎出知西安府見鄱主簿孫誕曰公本鸞鳳豈終枳棘之棲後官遷至山西按察僉事言無不驗人呼爲雙道士府志

西渚子鄱陽人或謂其本孝廉以下隱遇物起數甚驗有某儀賓持象牙笏問之曰笏笏之貴卻緣骨月後優人亦以簪笏往日雖近簪笏奈體輕微居鄱久著名異

遊四方各變名號以顯其術志安

洪魁八樂平人世業岐黃幼得異授精於太素脈八法神鍼邑人黎澄葉瑞當未遇時以疾延其診視輒預定其科第與歷任地方卒之時日斷休咎死生百不失一年八十餘無疾而坐化志安

徐善繼德興人補邑庠生以親喪未厝與弟善述究心堪輿之學因得吳景鸞遺書於天門白雲洞遂深明其奧旨遷縣治易學基士大夫莫不欽其慧識所著有人子須知徐文貞階序其書志安

國朝

吳棟字毓山浮梁人少讀書後攻岐黃術凡治病以意神明古法有奇效求治者眾多不責報粹然儒者之行

江西通志卷百七 方術

縣志

余樹芝字懷封德興人通形家言得蔣大鴻地理辨正不傳之秘手撰羅經盡該元空八卦之義志縣

彭選字芝峯鄱陽人工書善繪事

高宗南巡直隸總督胡莊敏扈

蹕聚畫家五十人試優劣拔十人選與馬莊敏使人繪十簋進呈

御覽聲聞益著順天鄉試取膺錄議敘州判屢膺劇職有能聲

官至瓊州府同知志縣

胡國棠字召樹萬年人諸生業醫精幼科望氣知病狀製劑一投即愈著書曰一見了然生平事母至孝外出預訂歸期風雨不爽歸猶踟躕謝疏曠子劉誠能讀父書

縣志 以上饒州府

晉

幸靈建昌人性少言與小人羣居見侵辱而無愠色邑里號之癡雖其父母兄弟亦以為癡也嘗使守稻羣牛食之靈見而不驅待牛去乃往理其殘亂者父母見而怒之靈曰萬物生天地之間各欲得食牛方食奈何驅之其父愈怒曰即如汝言復用理壞者何為靈曰此稻又欲得終性牛自犯之靈可以不收乎時樊長寶作官船於建城山令人各作箸一雙靈作而未輪或竊之而心痛靈曰得無竊我箸乎竊者不應頃愈急靈曰不以情告我真死矣竊者乃出之靈飲之以水病即愈船當下吏以二百人引一艘不能動靈請自牽之惟用百人

江西通志卷百七 方術

手

而船去如流龔仲孺女病積年靈以水含之而愈呂猗母皇氏得痿痺病十餘年靈療之去皇氏數尺而坐瞑目寂然有頃顧猗曰扶夫人起猗曰老人得病多年何可倉卒起邪靈曰但試扶起俄又令去扶即能自行遂愈高惺家有鬼怪言語訶叱投擲內室不見人形或器物自行再三發火乃邀靈靈惟據軒小坐而去其夕鬼怪即絕靈所救愈多類此然不取報謝行不騎乘長不娶妻性至恭見人即先拜言輒自名志縣

元

劉開字立之習釋老學嘗遊廬山遇異人授以太素脈行世元帝召赴闕賜號復真先生卒葬於西古山志安

明

鄧霆祐號元元真人釣臺鄉人同袁奎秘授符呪異術於李元洲凡禱雨祝晴降魔逐疫無不應也俗傳其白晝驅雷神現形拔庭西大樹植之東邊子又元孫重元世傳其術云建昌縣志以上南康府

唐

白岑曾遇異人傳發背方其驗十全後爲淮南小將節度高適脅取其方然不甚驗岑至九江爲虎所食驛吏於囊中乃得真本太原王昇之寫以傳布國史補

宋

法堅廬山僧以醫名宋太祖召見賜紫方袍號廣濟大師景德二年雍王元份久被疾召赴闕至則元份已薨還山卒時沙門法蘊亦以善醫工診切每先歲時言人

江西通志卷一百一 方術

三

生死多中賜紫方袍號廣利大師一時稱藥王藥上再現云安志

李仲甯九江碑工黃山谷題其居曰琢玉坊崇甯中刊元祐黨籍姓名太守使劓之李曰小人家故貧竇因刻蘇內翰黃學士詞翰至飽煖名爲奸人誠不忍下手守義之曰賢哉士大夫所不及也餽以酒從其請王氏撰

明

王九達字曰達德安人性疏放坐事被逮逃之吳越閒遂家焉刻苦攻醫自悟心法治輒應手凡治病或愈或否預言時日不爽崇禎開典職太醫錢相國龍錫喜述之所著有素問靈樞合類九卷又心傳九種何郎中萬化吳尚寶爾成韓侍讀敬序安志

宋光紳字橫秋業儒不遇先世曰杏莊者善小兒痘證遊四方遇異人授以秘書醫由是顯光紳習其書復擅長一時人延之風雨弗避未嘗計利也一日暮歸道拾遺金啟視之則某甲輸糧者晨起詣故處望其人踰踰來告曰我拾得以俟君其人願分半爲壽光紳笑而遺之彭澤志

花自達字喬石德化文學父質宇患痔手調飲食侍寢處六年卽留心於醫所著有尊經上下二傳時王九達有素問靈樞合類之編慮其割裂顛倒故題其書以尊經名論著外感內傷并分條貫知醫者好誦之富貴家召之恆不赴貧苦者則不召自往開周以藥餌病將死家人慮附身之具未備自達曰吾姑待之越數日知略具起索筆硯家人私計當有遺言自達伸紙疾書曰生平無所得惟此兩玉壺一朝帶不去撒手隨太虛擲筆而逝府志

江西通志卷一百一 方術

三

李樞字景衢瑞昌人以善弈名性至孝垂老不離父母左右大學士熊賜履巡行浙省聘樞自從樞不允強之登舟甫解纜望北號泣終不能奪江南黃立奔中稱國手聞樞名買舟至洪都與較勝負觀者如堵三戰三北愧沮而行局譜載石室秘藏府志

國朝

譚文字在茲德化人家徒四壁淡然寡營顧酷嗜疇人言有神解嘗著數學尋源府志王日助字幼安瑞昌人工醫主方不專一家嘗治邑令

妻沈病一劑而愈酬以金固辭曰子醫父母敢望報邪時里中有兄病先以弟試之假作劇態日助診之日肺脈如湯死在旦夕矣其人匿笑及夕果死

府志

戴繩周字孚公瑞昌人工醫好施貧者嘗有一人故無恙繩周私語曰是人面馬肝色又青氣鎖口於法七日當死至期果暴卒又嘗以薑桂治鼻衄病家畏忌不敢與飲繩周強飲之藥盡血止

府志

程剛中字子潛瑞昌人善畫嘗繪廬山圖

府志以上九江府

唐

楊元亮襄州人久視中年二十餘於虔州汶山觀傭力晝夢見天尊云我堂舍破壞汝爲我修造汝能醫一切病寤而說之試療無不愈者贛縣里正背有腫大如

江西通志卷百廿 方術

聖

拳亮以刀割之數日平復療病日獲十千造天尊堂成

遂無效

朝野僉載

楊筠松寶州人僖宗朝掌靈臺地理事官至金紫光祿

大夫黃巢破京城乃斷髮入崑崙山步龍後至虔州以地理術授曾文迪劉江東世稱救貧仙人是也卒於虔

葬零都藥口壩

府志

曾文迪零都崇賢里人師事楊筠松凡天文識緯黃庭內景之書靡不根究尤精地理梁貞明開至袁州萬載愛西山之勝謂其徒曰死葬我於此卒如其言後其徒忽見於豫章歸啟其柩無有也所著有八分歌二卷

書

劉江東零都人楊筠松在虔州江東因同曾文迪傳其

術初楊與曾並不著文字江東稍有口訣其裔孫謙爲宋吏部郎中知袁州事乃著囊經七篇詞旨明暢人傳誦之

安志

謹案舊志劉江東列宋代傳稱與楊筠松同時則唐末人也今改正

宋

謝昔臣虔州術士蘇軾過虔贈詩云屬國新從海外歸君平且莫下簾帷前生恐是盧行者後學還呼韓退之死後人傳戒定慧生時宿直斗牛箕憑君爲算行年看便數生時到死時

東坡集

卜則魏字應天贛縣人精形家言著作甚富所傳雪心一賦旨約而該業地理者咸宗之

安志

元

彭雷巖贛縣玉虛觀道士以祈禳方技顯於元盛時頃

江西通志卷百廿 方術

聖

刻閒能致風雨人有疾病立能愈之其魑魅爲怪者禁使絕迹解學士縉謂其得劉繼先遺術云

安志

明

蕭九賢字慕白會昌人精內外諸科洪武中充里長解實竹入都時馬后病乳癰甚危太醫罔效乃揭榜召醫九賢應召診視投劑三日而愈授太醫院吏目馳驛歸里著有外科啟鑰回生要義諸篇

會昌蕭氏族譜

邱宏道零都人博學能文得郭璞葬經究心三十年遂精其術淺深去就皆有法與人言必以忠孝爲本劉漳贛縣人吏滿考授樂昌高勝巡檢宣廟時以寫真得幸改鴻臚寺序班入內供奉尋升錦衣衛鎮撫副千

戶

安志